

雲平平平平

南

機

務

鈔

黃

夏吳漢胡

錄錄錄錄

平 胡 錄

陸 深 撰

平胡錄

雲間陸深著

嗚呼元政不綱久矣其亂亡之成實自順帝帝之至
元二年丙子廣東朱光鄉河南捧胡首難光鄉增城
人與其黨石昆山鍾大明聚衆作亂國號大金改元
赤符時惠州民聶秀卿亦稱兵與光卿合捧胡陳州
人以燒香惑衆作亂於信陽州破歸德鹿邑焚陳州
屯於杏岡時四川合州人韓法師亦擁衆作亂稱南
朝趙王尋皆討平之四年戊寅漳州南勝縣人李志
甫作亂圍州城殺守將朔思監袁州人周子旺作亂

稱周王改年號亦敗滅五年己卯杞縣人范孟殺河
南平章燕訪官謀拒黃河作亂官軍討誅之又明年
辛巳改至正元年冬湖廣燕南山東兵皆起道州人
蔣丙何仁稱順天王而兵起者至三百餘處矣至丙
戌六年汀州人羅天麟陳積萬起靖州徭人吳天保
起殺湖廣右丞沙剌班衆至六萬明年丁亥冬則沿
江之兵皆起矣戊子八年台州方國珍始據有土地
元乃以官啖之辛卯十一年是歲徐壽輝稱帝於蘄
水國號天完改元治平壽輝羅田人與倪文俊鄒普
勝等以紅巾為號攻城畧地建都設官屬樂城人韓

山童以白蓮會燒香惑衆倡言彌勒佛下生潁州人
劉福通與杜遵道羅文素盛文郁王顯忠韓咬兒復
詭言山童實宋徽宗八世孫當主中國同以紅巾起
事旣而山童就擒其妻楊氏及子林兒逃福通等奉
之功陷州郡衆至十萬而元不能制矣李二號芝麻
李者又與其黨趙均用彭早住攻陷徐州據之壬辰
定遠人郭子興與其黨孫德崖攻拔濠州據之至十
二月均用稱王而子興德崖屈已事之癸巳五月泰
州張士誠據高郵稱誠王十二月郭子興入滁州稱
王乙未十五年二月劉福通以韓林兒稱帝國號宋

改元龍鳳都毫七月我

太祖高皇帝起兵自和陽渡江丙子正月徐壽輝據漢陽二月張士誠據平江二月我師克金陵改集慶路為應天府三月我師克常州五月取寧國等路八月取揚州十二月隨州人明玉珍據成都戊戌十八年三月我師取建德路五月劉福通奉宋主韓林兒都汴梁路十二月我師取婺州己亥十九年三月方國珍以溫台等三郡降於我秋八月劉福通以宋主走安豐九月我師取衢州處州十二月陳友諒稱漢王庚子二十年漢王陳友諒弑天完主徐壽輝稱帝於

采石敗元大義都江州辛丑二十一年我師伐漢拔
江州壬寅二十二年正月胡廷瑞以南昌降於我三
月明玉珍破雲南自稱隴蜀王明年己卯二十三年
春正月遂稱帝於成都國號夏政元大統是歲張士
誠稱天祐元年二月士誠將呂珍入安豐殺宋劉福
通我師擊走之七月漢陳友諒圍我洪都我

太祖帥師討之友諒敗死子理立張士誠自稱吳王是
歲陳友諒知院將必勝饒昇臣等復陷吉安甲辰二
十四年我

太祖建國號曰吳是歲漢主陳理德壽元年二月自將

伐漢理降漢亡丙午二十六年三月夏主明玉珍卒
子昇立四月我師取淮安諸路九月取湖州諸路十
二月韓林兒卒宋亡丁未二十七年我

太祖稱吳元年九月我師伐吳執張士誠以歸吳亡十
月我師北伐定中原十一月頒戊申曆方國珍降我
師克燕元亡明年戊申為我

太祖聖神文武欽明啓運俊德成功統天大孝高皇帝
姓朱氏國號大明都金陵改元洪武元年戊申歲正
月初四日也

宋宋主諱林兒姓韓氏陶九成記本李氏子藥城人

也詭稱宋徽宗九世孫號小明王都毫國號宋改元
龍鳳元年寔至正元年乙未歲也偽詔畧曰蘊玉璽
於海東取精兵於日本貧極江南富誇塞北初宋廣
王走崖山丞相陳宜中走倭託此說以動衆壬辰年
五月徙瀛國公子趙完普於沙州從御史徹徹之請
也時諸處兵起皆以亡宋為名故也又曰虎賁三千
直擣燕幽之地龍飛九五重開大宋之天先是至正
庚寅間參議賈魯當承平時銳欲立名以垂世首勸
丞相脫脫興屯田更欽法明年辛卯夏四月復勸脫
脫求禹故道開黃河身任其事瀕河起集丁夫二十

六萬餘河夫多怨韓山童等挾詐陰鑿石人止開一眼鑄其背曰莫道石人一隻眼此物一出天下反預當河道埋之掘者得之相驚而從亂旬月之間衆至數萬人山童者林兒之父也母楊氏山童祖父以白蓮會燒香惑衆謫徙永平至山童倡言天下大亂彌勤佛下生河南及江淮愚民翕然信之特潁州人劉福通等與杜遵道羅文素盛文郁王顯忠韓咬兒復倡言山童當為中國主同起兵以紅巾為號縣官捕之急福通遂反山童被擒其妻楊氏與林兒逃之武安福通據成臯攻羅山上蔡真陽確山諸縣尋犯武

陽葉縣陷汝寧府及光息二州衆至十萬是時蕭縣人李二號芝麻李亦以燒香聚衆與其黨趙君用彭早住起淮安攻陷徐州據之君用稱永義王早住號老彭稱魯淮王八月也先帖木兒擊福通復上蔡殺韓咬兒十二年二月定遠人郭子興與孫德崖等稱元帥攻拔濠州據之八月元兵破徐州芝麻李遁趙均用彭早住走濠州十一月均用據濠州時徐州破均用來與子興德崖合力拒守兵已解子興德崖顧屈已下之而二人遂為所制既而早住死均用益自專遂據城稱王龍鳳元年二月宋主稱皇帝劉福通

等自礪山夾河迎林兒至亳立為皇帝以其母楊氏
為皇太后杜遵道盛文郁為丞相劉福通羅文素為
平章劉六知樞密院拆鹿邑縣太清宮材建宮闕遵
道等各遣子入侍時遵道專權福通殺之自為丞相
稱太保六月我

太祖起兵仍稱龍鳳年號十二月宋主走安豐元將答
失八都魯破福通復駐汴又敗之於太康遂圍亳福
通以林兒遁走安豐丙申龍鳳二年至正十六年也
三月我

太祖克金陵丁酉龍鳳三年至正十七年也二月李武

崔德破商州攻武關直趨長安三輔震恐元將察罕帖木兒與李思齊連兵擊敗之三月毛貴攻破膠萊諸州貴福通將也八月劉福通攻破汴梁遂分兵畧地時關先生破頭潘馮長舅沙劉二王士誠趨晉冀白不信大刀教李喜喜趨關中毛貴據山東其勢大振冬十月白不信等破興元遂圍鳳翔為李察罕所敗與李喜喜皆遁入蜀戊戌龍鳳四年至正十八年也三月毛貴破濟南殺元右丞董搏霄初貴入據濟南立賓興院選用故官分守諸路又於萊州立屯田三百六十處時搏霄方駐南皮縣營壘未定遂死之搏

霄字孟起儒將也是月田豐破濟寧毛貴破薊州豐
退保東昌貴畧柳林逼畿甸元徵四方兵入衛五月
福通攻汴守將竹真出走乃自安豐奉林兒居之以
為都六月關先生破頭潘等分兵二道一出絳州一
出沁州踰太行焚上黨破遼州晉冀雲中鴈門代郡
烽火數千里遂大掠塞外諸郡而還十二月關先生
轉掠遼陽至高麗焚燬上都宮闕己亥龍鳳五年至
正十九年也夏四月趙均用殺毛貴續繼祖殺均用
繼祖貴黨也自遼陽入益都相為讎殺我八月察罕
帖木兒兵復汴梁福通復以宋主走安豐庚子龍鳳

六年至正二十年也夏五月陳友諒弑主稱帝辛丑
龍鳳七年至正二十一年也秋八月察罕帖木兒兵
勝遣其子擴廓帖木兒擣東平復為書招豐及王士
誠皆降壬寅龍鳳八年至正二十二年也六月田豐
刺察罕帖木兒殺之初豐誠降察罕推誠待之數入
其帳中時以十一騎行至豐壘遂為士誠所刺蓋夙
謀也冬十一月擴廓帖木兒討田豐王士誠擒之取
其心以祭父執陳保頭等二百餘人獻元京斬之癸
卯龍鳳九年至正二十三年也二月張士誠將呂珍
引兵攻破安豐殺福通據其城

太祖聞之率徐達常遇春徃擊之珍大敗時廬州人左君弼助珍又擊敗之珍君弼皆走三月關先生餘兵復攻上都元將擊降之甲辰龍鳳十年至正二十四年也春正月我

太祖建國號曰吳乙巳龍鳳十一年至正二十五年也丙午龍鳳十二年至正二十六年也冬十二月宋主殂丁未我

太祖稱吳元年至正之二十七年也葉子奇記小明王下有劉太保者每陷一城以人為糧食人既盡復陷一城其人至不道若此豈卽福通耶當時又有劉六

者知樞密亦豈嘗為太保耶

天完天完主諱壽輝姓徐氏一名貞一羅田人也至
正十一年辛卯冬十月僭稱皇帝國號天完都蘄水
改元治平元年先是瀏陽人彭和尚名翼號妖彭能
為偈頌勸人念彌勒佛號遇夜燃火炬名香念偈拜
禮愚民信之其徒遂衆思欲為亂未有主也會壽輝
浴於監塘水中體有光恠衆皆驚異遂立為帝天下
應響壽輝本湖南人姿狀龐厚以敗布為業往來蘄
黃間然無他才能姿性寬縱權在群下建空名耳以
鄒普勝為太師兵陷饒州執魏中立陷信州執于大